

## Menara Babel

Petikan dari Kitab Taurat: [Kejadian 11:1-9](#).



<sup>1</sup>Pada mulanya, orang di seluruh dunia hanya mempunyai satu bahasa dan mereka menggunakan kata-kata yang sama. <sup>2</sup>Apabila mereka mengembara ke sebelah timur, mereka tiba di suatu dataran di Babilonia, lalu menetap di situ. <sup>3</sup>Mereka bercakap sesama sendiri, "Mari kita membuat batu bata dan membakarnya sampai keras." Demikianlah mereka mempunyai batu bata untuk dijadikan bahan binaan, serta tar sebagai bahan pelekat. <sup>4</sup>Mereka berkata, "Mari kita bina kota dengan sebuah menara yang puncaknya sampai ke langit, supaya kita termasyhur dan tidak tercerai-cerai di seluruh bumi."

<sup>5</sup>Kemudian TUHAN turun untuk melihat kota dan menara yang dibina oleh manusia. <sup>6</sup>Dia berfirman, "Mereka ini satu bangsa dengan satu bahasa, dan hal ini baru permulaan rancangan mereka. Tidak lama lagi mereka akan sanggup melakukan apa sahaja yang dikehendaki mereka. <sup>7</sup>Marilah Kita turun dan kacau bahasa mereka supaya mereka tidak memahami satu sama lain." <sup>8</sup>Demikianlah TUHAN menceraikan mereka ke seluruh bumi. Maka mereka berhenti membina kota itu. <sup>9</sup>Kota itu dinamakan Babel kerana di situlah TUHAN mengacau bahasa manusia, dan dari situlah TUHAN menceraikan manusia ke seluruh bumi.